

四明叢書

張宗祥



王侍郎

遺書

四明張氏約園開雕

序

嗚呼鞠躬盡瘁死而後已成敗利鈍非能逆觀此諸葛
武侯之言也侍郎死之日坐地上曰毋多言成敗利鈍
天也嗚呼何言之相似也夫四明一寨非有祁山六出
之兵長升雖才更乏襄中五千之餉無衣威賦裂帛傳
書局脊一隅前仆後繼經營五載死速生遲泊乎將星
墜芒山雉雒野大事既去絕命有詞從容東顧掠鬢謂
兵士曰汝曹猶得見漢官威儀也氣噉張巡之齒魂過
宗澤之河英雄之結局如斯君父之寄語猶在朱舜水

弔之曰寧可含恨而死不可視息而生豈庸人而識之比肩而遇之有意而爲之非其時而不爲之者哉嗚呼誠可謂侍郎之知友已讀侍郎詩曰鼎革從來有忠臣何代無一身存正氣百折不糊塗又曰守禮樂綱紀舍肝腦身軀留身復留事全髮莫全膚然則珠襦玉匣華表黃腸彼庸庸死者其肉其骨至今有存者乎收其頭而卒葬焉亦各盡其義而已固非侍郎所期於後之人也若其遺著則烈燄鐵骨不容銷磨者也豈可以其少而忽諸因馮君孟顓之纂劄劄以傳後蓋所以慰侍郎

者在此也抑侍郎忠矣先侍郎死者曰蔣士銓右良也
其弟翊宗初也從侍郎死者揚州石必正餘姚明知也
後侍郎死者其女字餘姚黃百家見於慈志者也因並
書之民國二十二年九月後學張壽鏞序

王侍郎遺著目錄

詩

七月廿五日奉川詩

七月廿八日寧波詩

八月初一日定海詩

八月初九日定海詩

文

八月初十日祭右良文

八月十一日祭弟完初文

三才圖會

約國刊本

王侍郎遺著

雪交亭正氣錄本

明慈谿王

翊完勲撰

詩

七月廿五日奉川詩

五載功未成一朝名已立平生忠愛心無愧對天日慷
慨入黃泉神魂隨帝側可憐母與妻相向空庭泣千古
綱常事眞傳惟我得勢窮事不偶身死殉社稷多少未
了事誰來代我職嗚呼大丈夫須繼天立極

七月廿八日寧波詩

庭鞠
時作

向作天中柱今爲堂下虜相逢白眼看一劍空隨我寄
語堂上人再思而後可誰無君父心時事胡其左談笑
且從容今日得死所平生忠憤血飛濺於羣虜

一作飛灑
若紅雨

八月初一日定海詩

天何生我遲何復死我速生遲不遇時風塵慘滿目人
民化犬羊紳士變禽犢死速志未酬英靈炤四瀆願生
天外天襁褓免胡服戎馬待髫年與君仍逐鹿功成兩
世名事定中華福忠孝總關情時人望子哭

八月初九日定海詩

鼎革從來有忠臣何代無未聞夷猾夏能帝我皇圖當
日文丞相躬垂萬世模一身存正氣百折不糊塗三載
生非倖千秋名豈沽歷年已數百此志何相符守禮樂
綱紀舍肝腦身軀留身復留事全髮莫全膚冤矣幼弟
死痛哉老母孤嗟乎妻弟婦寧忍去從胡鬼神爲我慟
河山草盡枯寄言諸君子幸勿常嘻吁

文

八月初十日祭右良文

壽鏞案右良蔣士銓也見
海東逸史嘉善諸生

嗚呼右良坐於名族而長享世祿髫年入泮更喜武功

聰明穎悟詩書文藝慷慨激昂忠孝節義實古之善士
今之偉人也憤國步之多艱痛父仇之未復與不佞翊
一見而投交共三年之馳逐風霜雨露晦明寒暑惟我
右良朝夕止宿嗚呼右良始以義成旣以義合卒以義
死舍生取義惟右良得之其不爲右良愧者鮮矣況右
良乃浙西之豪彥苟忍棄不佞翊而飄然早去非惟可
以得生而且可以自雄不第可以自雄尤可復計恢勦
事也惟右良不忍棄不佞翊而去遂至陷於非命嗚呼
痛哉右良之身膺刑獄實不佞翊有以致之也此不佞

翊重負右良而右良仍無負於不佞翊矣茲負不佞翊者皆得生獨不負不佞翊者偏得死死生之報抑何顛倒嗚呼痛哉不佞翊負天下之重望負君父之知遇負祖宗之世澤負老母之鞠育其所負多而死也固宜右良始終合義生死不負故悲悼也更切吾弟完初先右良死十七日其被禍益慘不佞翊無從奠哭昨乞得一金僅易牲醴冥資臨風拜祭惟右良與完初其鑒此心而徐以待我第右良復先不佞翊去六日寧不憾不佞翊不早與之偕行乎然右良完初死後不佞翊尙得以

一牲告虔於冥冥中待翊身死之日誰復爲悲號痛哭也嗚呼惜哉血淚交流靈其有知速來享之

八月十一日祭弟完初文

壽鏞案小腆紀年翊走海隅囚其弟翊招之不屈死

吾弟生於辛酉之五月初一日而吾父死七十日矣余甫五歲病骨伶仃吾母之憂辛勞瘁祖父母之愛養珍惜極人情之所未至及余壯頗不事家業吾弟勤於學復能知農其不甚爲窮所困者惟以吾弟賴焉江干後邵氏事敗購予急予方在海累吾弟刑獄者再軍興吾弟繕衣甲器具以佐軍中之不逮實獲其助今七月十

九日爲逆民所弑時余初解兵故不克卽爲報復但聞
信慘傷志意憤亂廿四日亦爲鄉人所執與吾弟相繼
殉難於國臣道則無愧於家子道則未善也傷哉吾母
生不能事矣祖母浮屠死不能葬矣吾弟之冤不能雪
矣惟所恃者則繼起之豪傑君子耳余欲爲吾弟傳以
紀之而復爲桎梏所苦神枯心裂何復措詞姑序其略
以待後之賢達同志云爾

三才圖會

繪圖刊本

王侍郎遺著